



14. oktober 2011

Inatsisartut suleriaasianni § 37 naapertorlugu Naalakkersuisunut apeqqutit imaattut saqqummiup-pakka:

**Naalakkersuisunut apeqqutit:**

1. Kalaallit Nunaanni 2010-mi meeqqanit tamanit qanoq amerlatigisut piitsuunertut eqqaanartuni atugaqarlutik inuuppat?
2. Ukioq 2010-p ingerlanerani pisariaqavissuinnarnut ikiorsiissutinik pisartuni meeqqat qassit najugaqarpat?

**Tunngavilersuut:**

2008-mi Mipip Kalaallit Nunaanni meeqqat inuuniarnerat pillugu saqqummersitsivoq. Saqqum-mersitami tassani Mipi ilaatigut ima allappoq: *”Kalaallit Nunaanni meeqqat 9 %-ii piitsuunermut eqqaanartumi inuupput. Tassa katillugit meeqqat 1.416-it, inoqutigiinni 576-isuni inuusut. Tamanna ima isumaqarpoq Kalaallit Nunaani meeqqat aqqaniliuppata ataaseq piitsuunermut eqqaanartumut inissisimavoq. Taaguutip piitsuunermut eqqaanartup erseqqissarpaa, inuiaqatigiinni sorlarni najugaqarneq apeqqutaatillugu piitsuussuseq assigiittanngitsaq. Meeraq piitsuunermut eqqaanartumi inuusarpoq ilaqutariit aningaasarliornerat pissutigalugu, pigisanik inooqataanikkullu iluaqutissanik inuiaqatigiinni meeqqat allat nalinginnaasumik pisinnaasaannik pisinnaanngikkaangami.”*

Taamaammat pitsuunermut eqqaanartumik inuunilinnut 2010-mi kitsitsit paaserusuppakka.

Misissuinermi tassani Mipi nangilluni allappoq: *”Aammattaaq Kalaallit Nunaanni meeqqani piitsuussuseq pillugu misissuinerup takutippaa Kalaallit Nunaanni meeqqat tamarmik 39 %-ii inoqutigiinni ukiup ingerlanerani pisariaqavissuinnarnut ikiorsiissutinik pisartuni inuusut. Meeqqat katillugit 6.142-t, inoqutigiinni 2.821-ini inuusut. Tassa Kalaallit Nunaani meeqqat quliuppata taakkunannga sisamat. Pisariaqavissuinnarnut ikiorsiissutinik pisartagallit tassaapput isumaginninnikkut tunniuttakkat, 2004-mi kalaallit isumaginninnikkut inatsiliaanniittut. Periarfissaasinnaasut tamarmik iluatsinngitsumik misilereerneqaraangata pisariaqavissuinnarnut ikiorsiissutit tunniunneqartarput.”*

Meeqqat qanoq amerlatigisut inoqutigiinni 2010-p ingerlanerani pisariaqavissuinnarnut ikiorsiissutinik pisartuni inuunersut paaserusuppara.

Akitsinnguaq Olsen, Siumut